

KALATE PAUL A NGA TILI BOTE YA RÔM

Mebetan

(Gal 1 : 1-5. Tit 1 : 1-4)

1 1 Ma Paul, mboésané Yésus Krist, me nga lobane na me bo nlôman, me nga teleban mfa'a ya mbamba foé Zambe, 2 nje été a nga tate kat anyu bekulu mejô bé e Mimfufub mintilan été, 3 ajô Mone wé, nnye ate a nga bialé mvoñe bôte David mfa'a ya minsôn ; 4 nnye ate fe a nga litiban a ngule na, a ne Mone Zambe, mfa'a ya nsisim ya étyi, amu ñwômane miñwuan, Yésus Krist Nti wongan. 5 Amu nye, bi nga nyoñ mvam a éto nlôman, na mewô'ô ya mbunan me kui e be meyoñe mese amu jôé dé, 6 mia fe mi nga lobane na mi wô'ô a Yésus Krist mi ne été. 7 E be ba bese be too Rôm, ba Zambe a nye'e, be nga lobane na, be bo mimfufub : Mvam é bo'o e be mia a mvo'é, bi so'o be Zambe Tate wongan a be Nti Yésus Krist.

Nkômbane Paul Ya Ke Yene Rôm

(Rôm 15 : 23-32 ; 1 Tés 1 : 1, 2, 8 ; 3 : 7-13)

8 Osusua, m'ave Zambe wom akéva amu Yésus Krist ajô mia bese, ane mbunane wônan w'atoteban e ngume si wu. 9 Amu Zambe a ne ngaa wom, nnye m'abo ésaé a nsisime wom e mbamba foé Mone wé, na teke'e jô'é, m'atote mia kom ése e meye'elane mam été, 10 me wô'ô sili na, ja'ana éyoñ évé, me yene mvom e nkômbane Zambe na, me kui e be mia. 11 Amu m'aya'a na, me yene mia, ane me ne ve mia akab éziñ ya Nsisim, nde ete me ne yemete mia ngu. 12 Nalé ate bia be mia bi aye volôbane minlem, môt ase ya be bia a mbunan ya nyô mbok, éñwônan a éñwom mibaane. 13 Ve, A bobejañ, me nji kômbô mi dimi na, me nga ty'i biyoñe biyoñ na, me zu e be mia, nde ete me ne yene bibuma bivo'o e be mia aval fe ane me yeneya e be bikul bivok, ve azukui den me nga kamban. 14 Me tii mvôla mfa'a Begrek a mfa'a Bilobelobé, mfa'a mimfefek a minsusuk bebaane. 15 Nalé ate, m'aya'a na me kate mia mi too e Rôm, mbamba foé.

Ngul Mbamba Foé

16 Amu me ne te wô'ô mbamba foé ôson ; amu a ne ngule Zambe mfa'a ya nnyian e be nyô ase a buni ; e be mone Beyude ôsusua, wôna e be mone Begrek. 17 Amu nne zôsô éziñ ya Zambe a yené été, ataté mbunan akui mbunan ; aval ane e ne ntilane na,

“Nyô a ne zôsô amu mbunan a ye nyiñ.”

Mekua Me Ba Bôtô

(Besam 19 : 2-5 ; 81 : 12, 13 ; Yes 44 : 9-20 ; M.M. 14 : 16, 17 ; Ef 4 : 17-19 ; 1 Pét 4 : 3-5)

18 Amu ayaa Zambe d'alitiban e so'ô yôb, amu ébiasé mbunan ése, a ékotekot ya bôt, mmbe b'abi benya mejôô ékotekot été. 19 Amu na, mam bôt b'ayem ajô Zambe m'ayené e be be, amu Zambe a nga liti be me. 20 Amu aso ntéan ya si nyô, mam mé me ne te yéné me ne na, ngule jé ya nnôm éto a éto jé ane Zambe, b'atu'a yéné e be biôm bi nga boban, nalé b'aye bo teke'e éfia meveñ : 21 amu na, be yeme' Zambe, ve te wumulu nye ane Zambe, nge ve akéva. Ve be nga bo mekut a asimesane dab, minsusu'u minlem miab mi nga bo dibi. 22 Be memetane na be ne mimfefek, be nga viane bo minsusuk, 23 be nga folan étôto'o ya Zambe a ne te wu, e be jôm é ne éyeka'a ya mô't a wu, nge ji ya anon, nge betit be nee mebo menyin, nge biôm bi awôñ.

24 Jam ete nde Zambe a nga miabete be mfa'a ya mvin ya mbia minkômbane ya minlem miab, nde b'aye bo menyôle mab mam ya ôson e zañe jab ; 25 mmbe be nga folane benya mejôô me Zambe a minsos, be nga kañ a saéan ététéa jôm, sa Nté biôm, nnye a ne ébotan akekui nnôm éto. Amen. 26 Amu ajô ete, Zambe a nga miabete be mfa'a ya mbia minkômbane ya ôson : amu binga bap be nga veñesan mboan ya éyeme jab, ô bo wu w'aselane wô. 27 Aval ete fe befam, be nga li'i nya zene ya fulane minga, bebien bebien be nga yôñ a mbia nkômbane wob, befam befam be bo'ane mam me ne ôson, a nyoñe meya'an m'ayiane nkômbane wob e menyôle mab. 28 Nde aval ete be nji kañese ba'ale Zambe e ñyemane wob été, Zambe a nga miabete be e bemomo mefek na, be bo mam me ne te yian ; 29 be nto njalan a ékotekot ése, mbia be mam, mboan éngôngôt, mbia nlem, njalan a mesengan, ñwôéane bôt, ntañete, medu'an, asum, mfuk ; 30 minzôzok, bevini Zambe, évô, mebun, ngunguan, beté mbia be mam, melo e be bebiaé, 31 mekut, betyam bilat, bevini bivuvuman, minjejet. 32 Mmbe bete, akôsabo be yemeya abendé Zambe na, ba b'abo aka'a mam ete b'ayan awu, be nji bo mam ma ve mboan étam, b'ayene fe ba b'abo me, mvaé.

Zôsôa Ntyi'ane Mejôa Zambe

(Ekk 12 : 15, 16 ; Mat 7 : 1-5. Luk 12 : 47, 48 ; M.M. 10 : 34, 35 ; Rôm 4 : 10-12 ; Gal 6 : 7, 8. Yak 1 : 22-25)

2 1 Ajô ete, ô se éfia meveñ, A mô't, nyô ase ô né, éyoñ w'ave mô'te mfe mekua. Amu vô'm w'ave nye mekua, ô bo'ô fe mam mete mebien. 2 Nde bi ayeme na, ntyi'an mejô Zambe w'akui e be bôt b'abo aka'a mam ete, ô ne benya mejôô. 3 Nde, A mô't, wo w'ave ba b'abo avale mam ete mekua, womien ô bo'ô fe me, ye w'asimesane na, w'aye fam ntyi'ane mejô Zambe ? 4 Nge na, ye w'abiasé afo'ô ya mvame jé, a ñwuane ya nleme wé, a njibane wé, a dimi na mvame Zambe éte j'adutu wo mfa' a ya nkôñelane nlem ? 5 Ve amu ayete dôé, a te nkôñelane nleme wôé, w'akôane womien ayaa mfa'a ya mô's ayaa éyoñ zôsôa ntyi'ane mejô ya Zambe a ye litiban. 6 Amu a ye ve mô't ase aval ane mimboane mié mi né ; 7 mfa'a ya be ba, amu njibane ya mbamba mboan, b'ajeñ étôtok a ésemen, a ntaban ô ne te wu, a ye ve be ényíñe ya nnôm éto. 8 Ve e be ba be ne mengam, a te ve benya mejôô mewôk, ve viane ve ékotekot mewôk, ayaa a ayok bi aye bo. 9 Etibela'a a njuk bi aye bo e be mô't ase a bo mbia be mam, e bemone Beyude ôsusua, wôna e be mone Begrek, 10 ve étôtok a ésemen a mvo'é bi aye bo e be mô't ase a bo mbamba be mam, e be mone Beyude ôsusua, wôna e be mone Begrek. 11 Amu nsemame mesu me bôt ô nji bo e be Zambe. 12 Amu abime bôt e nga bo abé te metiñ, d'aye fe jañ te metiñ ; a abime bôt e nga bo abé e metiñe si, d'aye veban mekua a metiñ ; 13 amu sa bewô'ô metiñ be ne zôsô e mise me Zambe, ve bebo mam ya metiñ, mmbe b'aye kaléban. 14 Amu nge bikul bi ne te metiñ bi abo mam ya metiñ amu abialé dab, éyoñ éte, be bili metiñ e be bebien,

akôsabo be bji bi metiñ ; 15 b'aliti mam metiñ m'asili me ne ntilane e minlem miab été, vôm tyiñ nlem jab j'abo ngaa ya été, a minsimesane miab mi aluman wua ba wu mbok, mi bo'ole be, nge kalé be, 16 e môs ôte éyoñ Zambe a ye tyi'i ajô minsolane mi mam mi bôt a Yésus Krist, aval ane mbamba foé wom a né.

Beyude A Metiñ

(Yér 8 : 8, 9 ; Rôm 14 : 13 ; Yak 4 : 16, 17)

17 Ve nge w'aloene womien mone Beyude, ô ye'e fe e metiñ, a bo ngunguan amu nlatane wôé e be Zambe, 18 a w'ayem nkômbane wé, a kañese mam me ne mvaé, amu be ye'eleya fe wo mam ya metiñ, 19 ô too fe mebune na, womien ô ne nliiti mindindime zen, a éfufb ya ba be too e dibi ; 20 ô ne nlebe minsusuk a ñye'ele ayôme bongô, amu ô bili éyeka'a ya ñyemane mam, a ji ya benya mejôô ya metiñ ; 21 wo w'aye'ele bôte befe, ye w'abo te te'ele womien ? Eyoñ w'akate foé na, Te wub, ye w'awub ? 22 Wo w'ajô na, Te bo mejian, Ye w'abo mejian ? Wo w'ayene bengunemelan nyé, ye w'awub betempel ? 23 Wo w'abo ngunguan amu metiñ, ye w'ave Zambe ôson amu ntyamane metiñ ? 24 Amu e ne ntilane na, Jôé Zambe d'abiaséban e be bikul amu mia. 25 Amu ntyi'an atyel w'avolô fo'o, nge ô ne mbo mam ya metiñ ; ve nge ô ne ntyame metiñ ; wôna ntyi'ane atyele wôé ô vianeya bo ébis. 26 Ajô ete, nge ébise môt j'aba'ale bityi ya metiñ, ye ébise jé j'aye bo te lañeban ane ntyi'an atye ? 27 Wôna ba be ne bibis aso abialé ve be ba'ale metiñ, b'aye ve wo mekua, wo ô bili metiñ me ne ntilane a ntyi'an atye, ve ô tyame metiñ. 28 Amu môt a se ke nya mone Beyude, nyô a ne nalé atan ; nalé fe nya ntyi'ane atyele a se ke nyô ya atan, e minsôn. 29 Ve môt a ne nya mone Beyude a ne nyô a ne nalé mfa'a ya été, a nye ntyi'an atyele a ne ve nyô ya nlem, e nsisim, sa ane metiñ ; nnye éseka'a jé é nji so e be bôt, ve e be Zambe.

3 1 Nde mone Beyude a dañ mfa'a mbé ? Nge na, ntyi'ane atyel w'avolô jé ? 2 Abui, mimfa'a mise ; jam ôsu amu minjôan mi Zambe mi nga veban e be be. 3 Nde jé nge bevo'o be nga bo te buni ? Ye te mbunane wob a nga te'elane fulu ntôéane mame Zambe ? 4 Teke'e bébé ! Zambe a bo'o bebela, môt ase ke nlaa minsos, aval ane e ne ntilane na,

“Nalé ate w'aye kabe a mejô môé,

A w'aye dañ éyoñ b'aye tyi'i wo ajô.”

5 Ve nge ékotekote jangan j'aliti zôsôô Zambe, bi aye jô aya ? Ye Zambe a ne ékotekot éyoñ a liti bôt ayaa ? m'akobô ane bôt. 6 Teke'e bébé ! Aamu nge e ne nalé, Zambe a ye tyi'i si nyô mejô aya ? 7 Ve nge benya mejôô me Zambée m'abulu дума dé e minsône miam été, amu jé me ngenane me veba'ane mekua ane mboabé ? 8 Jé bi abo te bo mbia be mam, ane mbamba be mam m'aye zu ? aval ane bevo'o b'akobô bia njôan ôte ? Mekua mab m'ayiane be.

Teke'e Môt A Ne Zôsôô

(Met 6 : 5, 11, 12 ; Yiôb 15 : 14-16 ; Besam 14 : 1-3 ; Ekk 7 : 20 ; Gal 3 : 22)

Rev. Matthias MEYE
Secrétaire Général 1961.....

9 Nde aya, ye bia Beyude bi bili ndañane éziñ ? Momo ne tenn ! Amu bi ndôme bo'olô Beyude a Begrek bebaane na, bese be ne abé si ; 10 aval ane e ne ntilane na

“ Teke'e mô't a ne zôsôô, momo teke'e wua.

10 Teke'e mô't a yem ;

Teke'e mô't a jeñe Zambe.

12 Bese be maneya yale feñ, bese be maneya kob ;

Teke'e mô't a bo mvaé, teke'e, ja'ana wuwua.

13 Engoñe jab é ne yôyôa soñ ;

B'abelan ayeme dab mfa'a ya bo medu'an.

Nsu viet ô ne e biyaé biabe si.

14 Anyu dab e ne njalan a bibeka'a a mejô me ne ayô.

15 Mebo mab me ne avôl ya ke kuli metyi.

16 Endaman a minjuk bi ne e mezene mab ;

17 A be ne te yeme zene ya mvo'é.

18 Woñe Zambe ô ne momo e mise mab.”

19 Nde bi ayeme na, mam mese metiñ m'ajô, m'akobô ba be ne e metiñe si, nalé ate anyu ese d'aye diban, a si nyô ése j'aye bo nyô é bili étom e be Zambe : 20 amu teke'e minsôn mi aye kaléban e mise mé amu mimboan ya metiñ ; amu ñyeman ya abé w'azu amu metiñ.

Zôsôô Amu Mbunan

(Yes 53 : 4 ; M.M. 10 : 43 ; 2 Kor 5 : 21 ; Gal 2 : 15, 16 ; 3 : 8-14, 22-29 ; Ef 2 : 7-9)

21 V éyoñe ji, zôsôô éziñ ya Zambe a maneya yené teke'e so e metiñ, akôsabo metiñ a bekulumejô b'abo ngaa ya été ; 22 e ne na, zôsôô éziñ ya Zambe amu mbunan ya buni Yésus Krist mfa'a ba bese b'abuni. Amu nkandan ô ne momo ; 23 amu bese be nga bo abé, a kate kui e duma Zambe. 24 B'akalébane zesé a mvame jé, amu nkôtan ô ne e be Krist Yésus. 25 Nnye ate Zambe a nga telé ôsu ane metuna'a ya metyi mé na, me nyoñeban amu mbunan. Dina nde e nga liti zôsôa Zambe, amu e njibane Zambe, a nga daa mam abé me nga boban melu mvus, mis e yôb. 26 Ndemben a nga kuli éyoñe ji na, émien a ne zôsôô, a nkale ya nyô a bili mbunan e be Yésus.

27 Ajô ete, énguñe jagan é ne vôm mbé ? E ne momo. A za aka'a njôane ? Ye wu ya mimboan ? Momo ; ve a njôan ya mbunan. 28 Ajô ete bi ayemete na, mô't a kabe amu mbunan, sa amu mimboan ya metiñ. 29 Nge na, ye Zambe a ne Zambe Beyude étam ? Ye a nji bo fe Zambe biku ? Yaa, nyôa bikule fek ; 30 amu Zambe a ne wua, nyô a

kale bentyi'an atyele amu mbunan, a bibise fe amu mbunan ôte. 31 Nde ye bi ate'elane metiñ amu mbunan ? Teke'e bebé ! ve bi aviane yemete metiñ.

Eve'ela'a Abraham

(Met 15 : 5, 6 ; 17 : 9 ; Besam 32 ; Gal 3 : 6-9)

4 1 Nde bi aye jô na, Jé Abraham émvame jangan a nga yen aval ane minsôn ? 2 Amu nge Abraham a nga kabe amu mimboan, wôna a mbili jame ya wumulu émien ; ve sa mfa'a Zambe. 3 Amu ntilan w'ajô aya ? Ve na,

“ Abraham a nga buni Zambe, nde e nga lañebane nye na, a ne zôsôô.”

4 Nde mfa'a nyô a bo ésaé, ma'an me nji lañebane nye a ne mvam, ve ane mvôla. 5 Ve mfa'a nyô a ne te bo ésaé, ve buni nyô a kale mbiasé Zambe, mbunane wé w'alañeban ane zôsôô. 6 Aval ete fe David a tote mvom e be môt Zambe a lañe zôsôô mfa'a wé, te ke'e mimboan :

7 “ Be ne mvom ba mbia be mam mab me nto njaman, e ba mam abé mab me nto fe mbutan ;

8 a ne mvom nyô Nti a ye bo te lañ abé dé.”

9 Nde, ye mvome nyô j'akui e be bentyi'an atyel étam, ye e be bibise fe ? amu bi ajô na, Mbunan ô nga lañeban e be Abraham ane mekabe. 10 Nde ô nga lañeban aya ? Ye éyoñ éte a to ntyi'an atye, ye ébis ? Sa ñhe éyoñ a tyi'ibaneya atye, ve ébis. 11 Ane a nga nyoñe ndem ya ntyi'an atyel, éfeta'a ya zôsôô ya mbunan a nga bili éyoñ a nga too ébis. Ajô ete nde a ne ésa ya ba bese b'abuni, ja'ana be ne bibis, nde zôsôô ate a lañeban mfa'a wob ; 12 a bo fe ésa ya bentyi'an atyele, sa ba be ne bentyi'an atyel étam, ve ba b'awulu fe e bibô'a mebo ya mbunan Abraham, émvame jangan, ñwô a nga bili éyoñ a mbe ébis.

Ntiñetan O Nga Tôéban Amu Mbunan

(Gal 3 : 8-18, 26-29 ; Behéb 11 : 8-19)

13 Ntiñetan e be Abraham a mvoñe bote jé na, b'aye nyoñe si nyô ane ngab, ô nji so amu metiñ, ve amu mekabe ya mbunan. 14 Nge ba be ne ba ya metiñ mbe be ne bone be élik, mbunan ô nto momo a ntiñetane fe ô te'elaneya. 15 Amu metiñ m'azu ayaa, ve vôm metiñ me ne momo, ntyamane metiñ fe ô ne momo. 16 Amu ajô ete, jam ete e tii a mbunan, nde d'aye bo amu mvam. Nalé ate ntiñetan w'aye yeme ngul mfa'a ya mvoñe bôt ése, sa ve mfa'a nyô j'aso e metiñ étam, ve nalé fe mfa'a nyô j'aso e mbunan Abraham, (nnye a ne ésa bia bese, 17 aval ane e ne ntilane na, “Me boya wo ésa meyoñ abui,”) asu Zambe a nga buni, nnye a ve miñwuan ényiñ, a loene biôm bi ne momo aval ane nge bi ne. 18 Nyôlé ate a nga buni a ndinlem ése, akôsabo bo a nji bi jôm ya tabe je ndi, ane a ye bo ésa ya meyoñ abui ; ane be nga kate nye na, “ Nalé ate mvoñe bôte jôé j'aye bo.” 19 Nde a nji bo atek mfa'a ya mbunan éyoñ a nga fombô nyôle jé émien nje é nto éwuwua, émien a mbe bebé ane mimbu ntet, nge éyoñ a nga simesan éwuwua abume nkôkome Sara. 20 Ve mfa'a ntiñetane Zambe, a nga bo te sôan amu a kate buni, ve a nga bo ngul e mbunan a va'a Zambe duma, 21 a tuka'a buni na, nyô a nga tiñeti, a ne fe ngul ya bo jam a nga tiñeti. 22 Jam

ete fe nde mbunane wé ô nga lañebane nye mfa'a ya mekabe. 23 Ve mejô mana na, O nga lañebane nye, me nji tiliban ve mfa'a wé étam, 24 ve mfa'a wongane fe, w'aye fe lañeban e be bia bi abuni nyô a nga wômôlô Yésus Nti wongan e miñwuan, 25 nnye a nga veban amu minkobane miangan, a wômô fe amu nkalane wongan.

Asu'ulane Ya Nkalan

(Rôm 8 : 32 ; 1 Pét 1 : 3-9 ; 1 Yôh 4 : 9, 10)

5 1 Ajô ete, vôm bi nto nkalan amu mbunan, bia be Zambe bi nto mvô'é, amu Yésus Krist Nti wongan. 2 Amu nye bi yeneya ayiin e mvam été amu mbunan, nje bi tele été nyô ; a bi ava'a fe amu ndinlem ya étôto'o Zambe. 3 A sa ve nalé étam, ve bi ava'a fe e bitibela'a été, bi yeme na, étibela'a éte j'abiaé mban ; 4 a mban w'abiaé fulu ; a fulu éte, ndinlem ; 5 a ndinlem éte é ne te ve ôson, amu nye'ane Zambe a nga sôe e minlem miangan été a Mfufub Nsisim, nyô a nga ve bia. 6 Amu na, éyoñ éte bi ngenan atek, Krist a nga wu éyoñ j'ayian, amu ajô ya ba be ne te Zambe. 7 Amu e ne ayaé na mô't a wu ajô zôsôa mô't, ve ndô'ôtô mô't éziñ a ne zômbô wu ajô mbamba mô't. 8 Ve Zambe a liti nye'ane wé émien mfa'a wongan vôme nyina na, éyoñ éte bi ngenan beboabé, Krist a nga wu amu ajô dangan. 9 Ajô ete, vôm bi nto nkalan éyoñ jia metyi mé, abim avé bi aye nyiiban mfa'a ya aya Zambe amu nye. 10 Amu na, éyoñ bi mbe besiñ, Zambe a nga late bia e be émien, amu awu Mone wé, nguma'ane ke éyoñ bia be nye bi maneya lat, bi aye nyiiban a ényiñe jé ; 11 a sa ve nalé étam, bi ava'a fe e be Zambe amu Nti Krist wongan. Amu nye bi nyoñeya fe nlatan ôte éyoñe ji.

Adam Baa Krist

(Rôm 6 : 23 ; 1 Kor 15 : 21, 22, 45-49, 56, 57)

12 Ajô ete, aval ane abé e nga nyiin e si nyô amu mô'te wua, a awu amu abé ete ; a nalé ate awu e nga kui e be bôt bese, amu bese be nga bo abé. 13 Amu abé e mbe fo'o si nyô éyoñ metiñ me ngenan te veban, ve abé e nga bo te lañeban éyoñ metiñ me ne momo. 14 Akôsabo nalé, awu e nga jôô ataté e be Adam akui e be Môze, ja'ana e be ba be nji bo abé aval ane mboan Adam a nga bo ; nye a ne éve'ela'a ya nyô a ye zu.

15 Ve sa aval ane nkoban ô nga bo, aval ete fe mvean akab ô nga bo. Amu na, nge abui bôt e nga wu amu nkobane ya mô'te wua, abim ave ke mvame Zambe a mvean akab ô ngaveban bi aye bulu kui e be abui bôt, amumvam ya mô'te wua, Yésus Krist. 16 Nde mvean akab ô njo bo aval ane jam e nga so amu abé ya mô'te wua. Amu ntyi'an ajô ô nga tôñe nkobane wua ô nga zu mekua, ve mvean akab w'atôñ abui minkoban w'azuu nkalan. 17 Nge amu nkoban ya mô'te wua, awu e nga jôo amu mô'te wua ate, ngumane ke be b'anyoñ afo'o ya mvam a mvean akab ya zôsôo ya ényiñ amu mô'te wua, Yésus Krist. 18 Wôna, aval ane nkobane wua ya mô't w'azuu mekua e be bôte bese, nalé ate fe mboane zôsôo ya mô't w'azuu mekabe a ényiñ e be bôte bese. 19 Amu na, amu melo me mô'te wua abui e nga veñesan beboabé, aval ete fe, amu mewô'ô me mô'te wua, abui d'aye veñesan bezôsôo. 20 Metiñ me nga so na me buluu nkoban ; ve vôm abé e nga bui, mvam é nga dañedañ, 21 nde, aval ane abé e nga jôô awu été, aval ete fe mvam j'aye jôô akui ényiñe ya nnôm éto, amu Yésus Krist Nti wongan.

Nwuan Mfa'a Ya Abé, Ve Veve E Be Krist

(Gal 2 : 19, 20 ; Kol 2 : 11-13 ; 3 : 1-10 ; 1 Pét 4 : 1, 2)

6 1 Nde bi aye jô aya ? ye bi ke ôsu abé été ane mvam j'aye bo abui ? 2 Teke'e bébé ! bia bi nga wu mfa'a ya abé, bi aye fe beta tabe de été aya ? 3 Nge na, ye mi adimi na, bia bese bi nga baptizôban be Krist Yésus, bi nga baptizôban awu dé été ? 4 Ajô ete, bi nga jambe a nye a mbaptizô w'akui awu ; nde aval ane Krist a nga wômô akôlô miñwuan amu duma Esaa, aval ete fe bia bi aye wulu mfefé ényîñ. 5 Amu nge bi nto nlatan e be nye éfunan ya awu dé été, nalé fe bi aye bo mfa'a ya ñwômane wé été ; 6 bi yeme na, nnômô môte wongan ô nga tyeléban a nye e krôa, ane nyôl ya abé j'aye te'elan, nalé ate bi aye bo te fe saéan a abé. 7 Amu na, nyô a wuya a kabe ya mfa'a ya abé. 8 Ve nge bi nga wu bia be Krist, bi abuni na, bia be nye bi aye fe nyîñ, 9 bi yeme na, vôm Krist a nga wômô e miñwuan, a ne fe te beta wu. Awu e nji beta jôô nye. 10 Amu awu a nga wu, a nga wu awu da mfa'a ya abé, ve meeban a vee, a vee mfa'a Zambe. 11 Aval ete, lañane fe miabebien ane ba be ne miñwuan mfa'a ya abé, ve bevevee mfa'a Zambe e be Krist Yésus.

12 Ajô ete, abé e bo'ô te jôô e biuwua menyôle bienan été, ane mi aye ve mbia minkômbane ya été mewôk. 13 Nalé fe, te keane bibu'a bienane na bi bo bivôle ya ékotekot ; ve kean miabebien e be Zambe aval ane bevevee b'akôlô e miñwuan, a bibu'a bienan, ane bivôle ya zôsôô mfa'a Zambe. 14 Amu abé d'aye ke beta jô mia ; amu mi se ke e metiñe si, ve e mvame si.

Belo Ya Zôsôô

(Yôh 8 : 31-36 ; Rôm 7 : 4-6 ; Tit 2 : 11-14)

15 Nde jé ? Ye bi abo abé, amu bi se ke e metiñe si, ve e mvame si ? Teke'e bébé ! 16 Ye mi nji yeme na, nyô mi akee miabebeien ane belo b'awô'ô nye, mi ne belo be nyô mi abo mewôk ; to'ane ba ya abé mfa'a wua, nge ba ya mewôk mfa'a zôsôô ? 17 Ve akéva e bo'ô e be Zambe, amu vôm mi mbe belo be abé, mi nga bo éve'ela'a ñye'elan be nga ye'ele mia mewô'ô m'aso e nlem. 18 Nde vôm mi nga téléban beti mfa'a ya abé, mi nga bo belo mfa' ya zôsôô. 19 M'akobô nkobô mô, amu ate'e ya minsôn mienan. Amu aval ane mi nga kee bibu'a bienan ane belo ya mvin a ébiasé metiñ j'akui élebek, aval ete fe mi ke'ane bibu'a bienan mfa'a zôsôô amu mbunan. 20 Amu éyoñ mi mbe belo be abé, mi mbe beti mfa'a ya zôsôô. 21 Nde, za bibuma mi nga bili éyoñ éte, e be mam mi awô'ô me ôson éyoñe ji ? Asu'ulan ya mam mete e ne awu. 22 Ve éyoñe ji, vôm mi télébaneya beti mfaa ya abé a bo belo mfa'a Zambe, mi ba'ale'e, ébuma jenan é ne mfuban, asu'ulan ya été e ne ényîñe ya nnôm éto. 23 Amu ma'an ya abé me ne awu, ve mvean akabe Zambe ô ne ényîñe ya nnôm éto e be Krist Yésus Nti wongan.

Eve'an Aluk

(Rôm 6 : 14 ; Gal 2 : 19, 20 ; Ef 5 : 25-31)

Rev. Matthias MEYE
Secrétaire Général 1961.....

7 1 A bobejañ, ye ma adimi, amu m'akobô ba b'ayem metiñ na, metiñ m'ajôô mô̄t ve nté ôse a vee ? 2 Amu na, éyoñ minga a lu'ubaneya, a ne nka'an a metiñ e be nnôm, nté nnôm a vee. Ve nge nnôm a wôé, éyoñ éte a tiibaneya e metiñ ya be nnôm. 3 Ajô ete, nté nnôm a vee, nge a lu'uban e be fame fe, a ye loban mbomejian, ve nge nnôm a wôé, a nto nti mfa'a ya metiñ. Eyoñ éte a nji bo mbomejian, ja'an a lu'uban e be fame fe. 4 Nalé ate, A bobejañ, mia fe mi nga bo miñwuan mfa'a aya metiñ amu nyôle Krist, nde ete mi nga lu'uban e be mô̄t mfe, nyô a nga wômô akôlô miñwuane na, bi wum bibuma mfa'a Zambe. 5 Nde éyoñ bi mbe e misôn été, mbia minkômban miangan ya abé, amu metiñ, mi nga vuñ e bibu'a biangan été, na bi wum bibuma mfa'a ya awu. 6 Ve éyoñe ji bi tiibaneya mfa'a ya metiñ, bi nto miñwuan e be jôm bi nga too minkôme mié, ajô ete bi nji ke fe saan a nnôm ntilan ya metiñ, ve a mfefé ényifé ya Nsisim.

Endeñela'a Ya Abé E Totoo

(Rôm 3 : 19, 20 ; 4 : 15 ; 5 : 20 ; Gal 3 : 21, 22)

7 Nde bi aye jô aya ? Ye metiñ me ne abé ? Teke'e bebé ! Ve na, me nga ye bo te yem abé, nge te metiñ. Me nga ye bo te yeme jom é ne minyamete, nge metiñ me nga ye bo te jô na, W'aye bo te nyamete. 8 Ve abé, ayen e nga yen afôla amu mvinda, e nga bôndé minyamete mise e be ma; amu nge te metiñ, ve abé e ne ñwuan. 9 Amu me nga too melu kôa teke'e metiñ, ve aso metiñ me nga so, ane abé é nga vebe, nde me nga wu. 10 Mvinda ébien é nga tiñeti ényifé, é nga viane bo me awu ; 11 amu abé, vôm e nga yen akalan, e nga du'u ma a wôé ma. 12 Nalé ate, metiñ me ne mfuban, a mvinda é ne mfuban, a zôsôô a mvaé.

13 Nde, ye jôm é ne mvaé é nga viane bo awu mfaa'a wom ? Teke'e bebé ! ve abé nde e nga bo awu a jôm é ne mvaé e be ma, nalé abé e nga yené na e ne abé, nde ete abé e nga bo étua abé amu mvinda. 14 Bi ayeme na metiñ me ne nsisim ; ve ma me ne minsôn, nkuseban e abé si. 15 Me ne te yem mimboane miam. Amu me nji bo jam m'akômbô, ve m'aviane bo jam ébien m'avini . 16 Eyoñe ji, nge m'abo jam me nji kômbô, m'akañese na metiñ me ne mvaé. 17 Nalé ate, sa fe ma m'abeta bo de, ve abé e too e be ma. 18 Amu m'ayeme na, teke'e mbamba jam a too e be ma, e ne na, e minsône miam. Me ne ngul ya kômbô jam e ne zôsôô, ve me nji bo ngul ya bo de. 19 Amu me nji bo jam e ne mvaé m'akômbô, ve abé me nji kômbô nde ete m'abo. 20 Nde nge m'abo jam me nji kômbô, sa fe ma m'abo de, ve abé e too e be ma. 21 Nde me yeneya dina na, éyoñ m'akômbô bo mvaé, abe nde e nto me bebé. 22 M'anye'e atiñe Zambe e nleme wom été, 23 ve me lôô a tiñ afe e bibu'a biam été, nde d'awowsan atiñe ya nleme wom, a bo me nkôm e be atiñ ya abé, nde e too e bibu'a biam été. 24 Ngo'o me éngôngole mô̄t ? 25 Akéva e bo'o e be Zambe amu Yésus Krist Nti wongan ! Ajô ete, m'asaéane metiñ me Zambe a nleme wom, ve a minsône miam m'asaéane metiñ ya abé.

Enyifé Ya Nsisim

(Rôm 6 : 22, 23 ; Gal 3 : 13, 14 ; 5 : 16-25 ; 6 : 8)

Rev. Matthias MEYE
Secrétaire Général 1961.....

8 1 Ajô ete, éyoñe ji, mekua me nji bo e be ba be ne be Krist Yésus. 2 Amu atĩñ ya Nsisim ényĩñ e be Krist e nga telé me nti e be atĩñ ya awu. 3 Amu Zambe a nga bo jam metĩñ me mbe te ngul ya bo, amu ate'e ya minsôn : amu nlôman a nga lôme Mone wé émien a be'e éfunane ya minsôn mi ne abé a amu abé, a nga ve abé mekua e minsôn été, 4 nalé zôsôa jam metĩñ me nga sili a nga tôéban e be bia, bia bete bi nji wulu ane minsôn, ve ane Nsisim. 5 Amu ba b'anyĩñ ane monsôn b'asimesane mam ya minsôn, ve ba b'anyĩñ ane Nsisim b'asimesane mam ya Nsisim. 6 Osimesane ya minsôn ô ne awu, ve ôsimesane ya Nsisim ô ne ényĩñ a mvo'é. 7 Amu ôsimesane ya minsôn w'asiñe Zambe ; ô nji ve metĩñ me Zambe mewôk, nalé fe ô vo'o bo de ; 8 a ba be ne ba ya minsôn be vo'o fuu Zambe nlem. 9 Ve mia mi nji bo ba ya minsôn, mi ne ba ya Nsisim, nge Nsisim Zambe ô too fo'o e be mia. E môť a nji bi nsisime Krist, a nji bo éñwé. 10 Ve nge Krist a ne e be mia, akôsabo menyôle menan me ne miñwuan amu abé, minsisime mienan mi vee amu zôsôô. 11 Nge Nsisim ya nyô a nga wômôlô Yésus e miñwuan ô too e be mia, nyô a nga wômôlô Krist Yésus e miñwuan a ye ve fe biwuwua menyôle bienan ényĩñ amu Nsisime wé ô too e be mia.

12 Ajô ete, , A bobajañ, bi tii mvôla, sa mfa'a ya minsôn, na bi nyĩñ ane minsôn . 13 Amu nge mi anyĩñ ane minsôn wôna mi aye wu, ve nge a Nsisim, mi aye wôé mimboane ya nyô, wôna mi aye nyĩñ. 14 Amu ba bese Nsisime Zambe w'awulu be, mmbe be ne bone be Zambe. 15 Amu mi nji nyoñe nsisim ya éto belo ane mi aye beta ko woñ, ve mi nga nyoñ nsisim ya éto bon. Eyoñ bi ayôtane na, A abba ! A Tat ! 16 Nsisim ôbien w'akañete nsism wongane na, bi ne bone be Zambe. 17 Nde nge bi ne bon, wôna bon be élik, bon be élik be Zambe, a beébe bone be élik bia be Krist, nge bi ajibi mintaé bia be nye, ane bia be nye bi aye fe wum.

Etôtok J'aye Bo

18 M'asimesane na, mintaé ya éyoñ bi ne ji, mi nji bo abim ya ve'an a étôto'o j'aye litiban e be bia. 19 Amu bitétéa bi ayange a beta biyebé nlitane ya bone be Zambe ; 20 amu bitétéa bi nga suubane si ane momo jam, sa ane nkômbane wob, ve amu nkômbane ya nyô a nga suu bie si a ndinlem ; 21 amu bitétéa bibien bi aye teléban nti e be éto belo ya ndaman a bi étôto'o éto beti ya bone be Zambe. 22 Bi ayeme na bitétéa bise bi nga fulane tat a nkô'ôlane mie akekui éyoñe ji ; 23 sa ve bitétéa étam, ve biabebiene fe, bia bi bili be mbômô bibuma ya nsisim, bi atat mfa'a ya été ane bi ayange éto bon be ntoñan, nkôtane ya menyôl mangan. 24 Amu bi nga nyiibana ndinleme nyô. Môť a nji tabe ndi nlem a jôm a lôô mis. Amu za a tabe ndi jôm a lôô ? Ve nge bi to ndi ajôm bi nji yen, bi ayange je a mban.

26 Aval ete Nsisim w'avolô bia ate'e dangan été ; amu bi ne te yeme ye'elan ane d'ayian, Ve Nsisim ôbien w'aye'elan ajô dangan a mintat mi ne teke'e atoté. 27 Nde nyô a fiale minlem mi bôt a yeme jôm é ne ôsimesane ya Nsisim, amu nsisim w'aye'elan ajô mimfufub aval ane nkômbane Zambe ô né. 28 Bi ayeme na, mfa'a ya mam mese, Zambe a bo na mvaé é yené e be ba b'anye'e nye, mmbe be nga loban ane mbôndane fe'e wé. 29 Amu ba a nga taté yem mbe fe a nga taté telé na, be bo éfunane ya Mone wé, nde ete a ye bo ntôle ya zañe bobebyañ. 30 Ba a nga tate telé nalé, mmbe fe a nga loen ; a ba a nga loen, mmbe fe a nga kalé ; a ba a nga kalé, mmbe fe a nga wumulu.

Nye'ane Zambe

Rev. Matthias MEYE
Secrétaire Général 1961.....

31 Nde bi aye jô aya mfa'a ya mam ma ? Nge Zambe a ne e be bia, za a ye tebe bia e ngame yat, 32 Nyô a nga bo te kame Mone wé émien, ve a nga ju nye ajô dangan bia bese, ye a ye bo te ve bia mam mese a nye ? 33 Za a ye bo'olô mintobane mi bôt mi Zambe jam ? Zambe nnye fe a too nyô a kalé ; 34 za a ye ve mekua ? Ye a ne Krist Yésus, nyô a nga wu, yaa nyô a nga wômô e miñwuan, nyô a too mbonnôma Zambe, nyô fe a ye'elan ajô dangan ? 35 Za a ye kandé bia a nye'ane Krist ? Ye étibela'a, nge njuk, nge ékpwe'ele, nge mfumbala zaé, nge soé, nge angôndô, nge fansoñ ? 36 Aval ane ntilane na,

“Amu ajô dôé bi awôéban ngume nté môs ;

Bi nga yené ane mintômba mi atyi'iban.”

37 Kokoo, mfa'a ya mam mana mese, bi adañ bedañ amu nyô a nga nye'e bia. 38 Amu m'atu'a yeme na, sa wu, sa ke ényiñ, sa ke beéngel, sa ke bejôé bennen, sa ke mam ya éyoñe ji, sa ke mam m'aye bo, sa ke biwôlô, 39 sa ke ôyabe yôb, sa ke édo'o si, sa ke ététéa jôm ésa, bi aye bo ngul ya kandé bia a nye'ane Zambe ô ne e be Krist Yésus nti wongan.

Zambe A Tob Israël

(Rôm 1 : 1-4 ; 3 : 1, 2 ; 10 : 1 ; 11 : 28, 29)

9 1 M'ajô benya mejôd e be Krist, me nji laa minsos, mone tyiña nleme wom a ne me ngaa e be Mfufub Nsisim na, 2 m'awô'ô beta ôlun a mintaé mi ne te amané e nleme wom été. 3 Amu me nga ya kômbô na, mamien me nyoñe biyo'é ya kandane Krist amu ajô bobējañ, bivuvumane biam mfa'a ya minsôn. 4 Mmbe be ne Israël, be bili éto bon, a duma, a bilat, a mveane metiñ, a ésaé nkañan, a mintiñetan. 5 Mmbe bemvamba be ne émbap. Nne Krist a nga so e be be, mfa'a ya minsôn, e Zambe a dañe mam mese a bo'o ébotan akekui nnôm éto. Amen.

6 Ve e nji bo aval ane nge mejô me Zambe me nga selan. Amu sa bese be nga so e Israël, be ne Israël. 7 Nalé fe na, sa bese be ne mvoñ Abraham be ne bone bé ; ve na, “ Mvoñe bôte jôé j'aye loban e be Isaac.” 8 E ne na, sa bon ya minsôn, mmbe be ne bone be Zambe, ve bon ya ntiñetan, mmbe b'alañeban a ne mvoñ. 9 Amu mejô ya ntiñetan, mme mana na, “ Aval éyoñ mbu di, nde m'aye so, a Sara a ye dib abume mon.” 10 A sa ve dili étam, ve Rebeka fe, éyoñ éte a nyoñeya abum e be fame jia, e ne na, e be Issak, émvame janggan, 11 amu bone bete be ngenane te tame bialé, nge tame bo jam e ne mvaé nge abé, nde amu mbôndane fe'e ya ntobane Zambe ô ne ngul ya ke ôsu, sa amu mimboane mi mam ve amu nloen, 12 e nga jôban e be nye na,

“ Mvendé j'aye bo mongô bisaé.”

13 Aval ane a nga tilibane na,

“ Yakob nnye me nga nye'e, ve Esau me nga vivni.”

14 Nde bi aye jô aya ? Ye ékotekot é ne e be Zambe ? Teke'e bebé !

15 Amu a nga jô Môze na,

“ M'aye ko éngôngol e be nyô m'ako éngôngo.”

Rev. Matthias MEYE
Secrétaire Général 1961.....

16 Nalé ate a nji bo amu nkômbane mô, nge amu mboane mô, ve amu mvame Zambe. 17 Amu ntilan w'ajô Faraô na, " amu jam ete nde me nga beté wo nkôñ na, me liti ngule jam e be wo, nde jôé dam d'aye kateban foé si nyôna ése."

18 Nalé ate a ko éngôngol e be nyô a kômbô, a e be nyô a kômbô, a bo ayet nlem.

Ayaa A Mvam

19 Nde w'aye jô me na, Amu jé a ngenan a jeñe bitom ? Za a ne ngul ya kanga nkômbane wé ? 20 Ve wo ô ne za, A mô, ô beta fetane Zambe ? Ye jôm é nga mééban j'aye jô nyô a nga mé je na, Jé ô nga bo me ana ? 21 Nge na, ye mmé viek a nji jôé étek, ane a ne nyoñ asôñe da, a mé vie'e ô ne édima, a ngabe fok, vie'e ô ne zesé jôm ? 22 Jé nge Zambe, vôm a nga kômbô liti ayaa dé, a na, be yem ngule jé, a nga jibi a abui ñwuane nlem, mevie'e ya ayaa me ne nkôman ya jañ, 23 ane a ye liti afo'o ya étôto'o jé e be mevie'e ya mvame jé, mme a nga tate kôme na me bo ma ya étôtok, 24 bia bete a nga loen, sa e be Beyude étam, ve e be Bikule fe ? 25 Ava ane a jô e be Hôzée na,

" Ba be nji bo ayofne dam, m'aye loene be ayofne dam,

A minga me nga bo te nye'e, m'aye loene nye nyô m'anye'e.

26 Nde d'aye bo na, vôm a nga jô na, Mi nji bo bôte bam, b'aye lobane na, bon be vevea Zambe."

27 Yesaya fe a yôtan ajô Israël na,

"Akôsabo tañe bone be Israël j'aye bo ane nsele'e ya mañ, ve mebuka'a ya be be m'aye nyiiban ; 28 amu Nti a ye bo ntyi'ane wé e si nyô na, ô tôteban a kui e susu'a."

29 Aval ane Yesaya a kuli fe na,

" Nge Nti ya minkunda a nga ye bo te lí'i bia mvoñe bôt, bi nga ye bo ane Sodom, bi nga ye funane Gomôra."

Israél Baa Mbamba Foé

(Rôm 10 : 16-21 ; 1 Pét 2 : 6-10)

30 Nde bi aye jô aya ? Ve na, Bikul bi nga bo te tôte zôsô, bi nga koane zôsô ate, e ne zôsô amu mbunan. 31 Ve Israël vôm be nga tôte zôsô a so e metiñ, be nji kabe. 32 Amu jé ? Amu be nji jeñe nye a mbunan, ve a mimboan. Be nga kolé ako'o ya nkolan ôbak, 33 aval ane e ne ntilane na,

" O lô, m'abôdé ako'o ya nkolan ôbak e Siôn,

akôm ya nkolan ôbak,

nde nyô a buni nye, a ye bo te veban ôson nyô."

Rev. Matthias MEYE
Secrétaire Général 1961.....

10

1 A bobejañ, nkômbane ya nleme wom a meye'elane mam e be Zambe ajô dab, bi ne na, be nyiiban . 2 Amu m'akañete mfa'a wobe na, b'anyan a ajô Zambe, ve sa ane ñyeman. 3 Amu vôm be nga dimi zôsôô a so e be Zambe, ve jeñe na, be telé éñwob bebien, e nji bo zôsôa Zambe mewôk. 4 Amu Krist a ne asu'ulane ya metiñ mfa'a ya nkalan e be nyô ase a buni.

Nnyian Mfa'a Bese

(Yes 49 : 1-6 ; Mark 16 : 15 ; 16 : 20 ; M.M. 13 : 45-49)

5 Amu Môze a tili ajô zôsô a so e metiñe na, " <môt a bo nye, a ye nyiñ amu nye." 6 Ve zôsôô a so mbunan a jô na, Te jô e nleme wôé été na, Za a ye bet e yôb été ? e ne na, a zuu Krist e si, 7 nge na, Za a ye sis e édo'o ébé été ? e ne na, a bete Krist akôlô mñwuan. 8 Ve d'ajôban aya ?

" Njôan o ne wo bebé anyu dôé été, a nleme wôé été ;" e ne na, njôan ya mbunan bi akate foé ; 9 amu nge w'aye mem a anyu dôé na, Yésus nnye a ne Nti, a buni fe nlem wôé été na, Zambe a nga wômôlô nye akôlô miñwuan, w'aye nyiiban . 10 Amu a nlem môt a buni mfa'a ya nkaban, a anyu môt a mem mfa'a ya nyiiban. 11 Amu ntilane w'ajô na, " Môt ase a buni nye a ye bo teveban ôson e nyô."

12 Amu na, nkandan ô nji bo e zañe mone Beyude a mone Begrek ; amu nnye a ne Nti ya bese, a afok e be ba bese b'aloene nye ; 13 amu na,

" môt ase a loene jôé Nti, a ye nyiiban."

14 Nde b'aye loene nyô be nga bo te buni aya ? a b'aye buni nyô be nga bo te wô'ôtan aya ? a b'aye wô'ôtan aya te nkañete foé ? 15 a b'aye kate foé aya, te na b'alômban ? Avale ane e ne ntilane na,

" Ngo'o abeñ me bo me ba b'akate mbamaba foé ya mbamba be mam."

16 Ve bese be nji vô'ôlô mbamba foé ate. Amu Yesaya a jô na,

" za a nga buni tyiñe jangan ?"

17 Nalé ate mbunan w'aso e ñwô'an, a ñwwô'an w'aso e mejô me Krist .

18 Ve m'ajô na, Ye be nji wôk ? Yaa, be nga wôk !

" Tyiñe jab é nga ke e si ése, a mejô mab akekui meku'a ya si nyô."

19 Ve m'ajô na, Ye Israél a nga bo te yem ? osusua, Môze a jô na,

" M'aye bo na mi sengan a ba be nji bo ayoñ, a m'aye bo na, mi yaa a nsusu'u ayoñ."

20 Nde Yesaya a dañ azômbô éyoñ a jô na,

" Me nga somban e be ba be nji jeñe ma, a me nga liti mamien e be ba be nji sili ma."

Rev. Matthias MEYE
Sacerdote Général 1961.....

21 Ve mfaa'a Israél ajô na,

“ Ngume nté môs, me nga same mo mam mfa'a ya bôt be ne melo a mfete .”

Mebuka'a Me Israél

(1 Sam 12 : 22-25 ; 1 Bejôô 19 : 9-18 ; Yes 6 : 9-13

11 1 Nde m'asili na, Ye Zambe a nga ben ayoñe dé ? Teke'e bebé ! Mamien me ne fe mon Israél, môte ya mvoñ Abraham, ayoñe Benjamin. 2 Zambe a nji ke bene ayoñe dé nde a nga tate yem. Ye mi nji yem ane ntilan w'ajô Elias, aval ane a nga soman Israél e be Zambe ?

3 “ A Nti, be maneya wôé bekulumejô bôé, be manya tyam bealtar bôé, nde ma étam me li'iya, b'ajeñe fe ényiñe jam.”

4 Ve éyalane Zambe é nga jô nye aya ?

“ Me maneya ba'ale mfa'a wom, befam betoyini zañbwa mmbe be ngenane te kut Baal meboñ.”

5 Ajô ete eyoñe biene ji, mebuka'a me ngenane ntoban amu mvam.

6 Ve nge ane a mu mvam, sa ke fe amu jam ya mimboan ; nge nalé, wôna mvam é nji beta bo mvam,

7 Nde jé ? Israél a nga sub teke'e bi jôm a nga jeñ. Mintoban mi nga bi je. Ve bevo'o be nga bo minlem ayet,
8 aval ane e nga tilibane na,

“ Zambe a nga ve be nlem ékotekot, a mis me ne teke'e yen, a melo me ne teke'e wôk, akekui môs ôbiene wu.”

9 A David a jô na,

“Tawôlô wob a bo'o ékoé a ôlam, jôme ya kolé ôbak a meya'an mfa'a wob ;

19 mise mab me boo dibi, be bo te yen, viti memvuse mab kom ése.”

Nnyiane Biku

(Zak 1 : 17 ; 8 : 13 ; Mat 21 : 40-43 ; 1 Kor 4 : 7 ; 10 : 11, 12 ; Ef 2 : 7-1

11 Nde m'ajô na, Ye be nga kolé ôba'a na, be ku ? Teke'e bebé ! Ve amu nkuane wob, nnyian ô kuiya e be Bikul, ane b'aye sengane be. 12 Nde nge nkobane wob ô ne akume ya si nyô, a nsubane wob akume ya biku, fo'ofé njalane wob w'aye bo .

Rev. Matthias MEYE

Secrétaire Général 1994

13 Ve m'akobô mia biku. Amu na mamien me ne nlôman ya biku, m'awumulu ésaé jam , 14 ane m'aye bo bôte ye ayoñe dam na, be bo aban, nalé m'aye nyii bevo'ô ya été. 15 Amu na nge mbenebane wob ô ne nlatane ñbwa ya si nyô, wôna nyoñebane wob w'aye bo, ve ane ényiñ é so'ô e miñwuan ? 16 Nde nge ébase fembé é ne étyi, wôna ngum ébañ ô ne fe nalé ; a nge ndi ô ne étyi, wona mintya mi ne fe nalé.

17 Ve nge mintya mivo'ô mi nga bu'uban, ve wo ôlivié ya fé ô nga bemban e zañe jab na ô kaban akume ya nya ôlivié. 18 Te bo ngunguan e be mintya, ve nge w'abo ngunguan, sa wo ô be'e ndi, ve ndi ñwô ô be'e wo. 19 Nde w'aye jô na, Mintya mi nga bu'uban amu na, ma me bemban été. 20 Ane fo'ô nalé ! Mi nga bu'uban amu te buni wob, a wo ô tele ngu amu mbunane wôé. Te bo mebun, ve koo woñ. 21 Amu nge Zambe a nga bo te kame bebialebiala mintya, nalé fe a ye bo te liñe wo. 22 Nde, tame yen mvam a ayo'ô Zambe : ayok, mfa'a ya ba be nga ku, ve mvam e be wo, vengevenge ve w'alangan e mvame jé été, nge sa nalé, wo fe w'aye tyi'iban. 23 Mmbe fe, nge b'aye bo te ke ôsu e mbenane mbunane wob été, b'aye bemban été ; amu Zambe a ne ngul ya beta beme be été. 24 Amu nge wo be nga tyik, wo ô nga bialé ôlivié émien ya fé, ô nga bemban e be ébebéa ôlivié, teke'e na abialé dôé e nga to nalé, foo' fé benya mintyaa b'aye bulane bemban e be ôlivié wob bebien.

Israél A Ye Beta Teléban

(Yes 54 : 7-10 ; 59 : 19-21 ; Yér 31 : 31-40 ; Ezék 36 : 23, 37 ; Oséa 3 : 4, 5)

25 A bobejañ, me nji kômbô mi dimi ndimba jame nyô : ayet minlem e nga kui e be éfas Israél, akekui ngume tañ ya biku w'aye nyiin été ; 26 nde nalé Israél ase a ye nyiiban, aval ane e ne ntilane na,

“ Nkôté bôt a ye so e Siôn ; a ye vaa ntabane te woñe Zambe e be Yakob ;

27 Elate ji nje m'aye bo e be be, éyoñ m'aye vaa mam abé mab.”

28 Mfa'a mbamba foé, be ne besiñ amu ajô denan ; ve mfa'a ya ntoban, be ne ba Zambe a nye'e amu ajô bimvame biap. 29 Amu mimvean a nloene Zambe bi ne te mejôban'ane. 30 Amu aval ane mi nga bo Zambe melo melu mvus, ve éyoñe nji mi yenyeya nkoan éngôngol amu melo mab, 31 aval ete fe be boya melo éyoñe ji, nde ete nkoan éngôngol ô nga litiban e be mia, be fe b'aye yen nkoan éngôngol ôte éyoñe ji. 32 Amu Zambe a maneya dili bese e mboane melo été, nde ete a ne ko bese éngôngo.

33 Huui ! aka'a édo'ô ya akum, fek a ñyemane Zambe bi né ! Ngo'ô mintyi'ane mié mi ne teke'e ayemelan, a mezene mé teke'e afasé ! 34 Za a tameya yem ôsimesan Nti ? Nge na, za a tameya bo mbôndé mefe'e wé ? 35 Nge na, za a tameya taté ve nye jôm, ane nye ke a ye jiane je ? 36 Amu mam mese m'aso e be nye, a me too amu nye, a m'asu'ulane e be nye. Duma e bo'ô e be nye akekui nnôm éto. Amen

Mfefé Enyiñ E Be Krist

(1 Kor 6 : 19, 20 ; 12 ; Ef 4 : 1-16 ; 1 Pét 4 : 10, 11)

Rev. Matthias MEYE
Secrétaire Général 1961.....

12

1 Ajô ete, A bobejañ m'aye'elane mia, amu nkoan éngôngole Zambe na, mi ve menyôle menan ane bevevee, mimfuban a minkañesan metuna'a e be Zambe, mme me ne ésaé Zambe Jenan é ne fek. 2 Mi bo'ane te vu si ndôn nyô, ve mi veñsa'ane bo minlem mienan mimfefé, nde ete mi ne yemelan jôm nkômbane Zambe ô né, ñwô ô ne mvaé, nkañsan a njalan.

3 Amu mvam é nga veban e be ma, m'ajô mô't ase ya be mia na, a bo' o te simesan émien adañ abim a yiane simesan ; ve nsimesane wé ô bo' o wu ô ne fek, aval ane Zambe a maneya ve mô't ase abime mbunane wé ô né. 4 Amu aval ane bi bili bibu'a abui e nyôle jia été, a bibu'a bise bi nji bi aval ésaé da, 5 nalé ate, bi ne abui, ve bi ne nyôle jia e be Krist, mô't ase ya be bia a ne ébu'a ya ba bevok. 6 Nde vôm bi bili mimvean mi aselan aval ane mvam é nga veban e be bia é né, ja'ane nkulane mejô, abim ane mbunane wongan ô né ; 7 nge ésaé mvolane le, e asaé mvolan jangan ; e nyô a ye'ele, e ñye'elane wé ; 8 e nyô a leb, e ésaé nlebane jé ; e nyô a kabe biôm, a bo'ok a ésos ; e nyô a volô minlem, abo' o de a mban ; e nyô a mvamane bôt, a bo' o nalé a mevak.

Mebendé Ya Enyiñe Kristen

(Behéb 13 : 1-3, 16 ; 1 Pét 3 : 8-12 ; 4 : 7-9 ; 5 : 5)

9 Nye'an ô bo' o te medu'an. Vina'ane mbia be mam ; kabeta'ane jam é ne mvaé. 10 Mfa'a ya énye'esane bobeyañ, mi nye'esan. Mfa'a ya ésemen, mi sema'ane mia mia. 11 Mfa'a ya mbane mboane mam, te boan éles ; mi bo'an ayôñ mfa'a ya nsisim. Bo'ane bisaé bi Nti. 12 Va'an e ndinlem été. Jiba'an étibela'a, bo'ane mban e meye'elan. 13 Mi va'ane biôm bi ajemban e be mimfufub. Bo'ane beyeñ anyeb. 14 Bota'ane ba b'akpwe'ele mia ; bota'an a te yo'an. 15 Va'an a ba b'avak ; yiane du a ba b'ayi. 16 Bo'an ôsimesane via, wua mfa'a nyô mbok. Te boane mebun, ve fula'an a bôt be ne nsuban e si. Te yenane miabebien ane mimfefek. 17 Te butan abé baa abé. Bônda'ane mbamba be mam mise me bôte bese. 18 Nge e ne ngul ya boban, aval d'ayian e be mia, taba'ane bôte bese mvo'é. 19 A bôt m'anye'e, te kunane miabebien, ve mi va'an ayaa Zambe afôla ; amu e ne ntilane na,

“ Akuna'a e ne jôm jam ; ma m'aye kun, nalé Nti a jô. 20 Ajô ete, nge nsiñe wôé a wo' o zaé, va'a nye bidi. Nge a wô'ô évé , nyu'u nye mendim : amu vôm w'abo nalé, w'akôban nye ma'a me nduan e nlô yôb.” 21 Bo' o te dañeban a abé, ve ô dañe abé a mvaé.

Mewôk E Be Bejôô

(Min 24 : 21, 22 ; Luk 20 : 20-26 ; 1 Pét 2 : 13-17)

13

1 Mô't ase a su'u émien e si e be bejôô, amu ngulenjôan é nji bo, te na j'aso e be Zambe ; a ba be bili je, mmbe Zambe a teléya. 2 Ajô ete, mô't a wosan ngulenjôan, a ntele ntyi'ane Zambe ngame yat ; a ba b'akange nalé, b'aye dutu bebien meleb. 3 Amu bivet bi nji bo ékowoñ mfa'a ya mbamba mboan, ve mfa'a ya mbia mboan. Nde, ye w'akômbô bo te ko ngulenjôane woñ ? wôna bo' o mbamba jam, a w'aye nyoñ éseka'a jé : 4 amu a ne mboésaé Zambe mfa'a ya bo wo mvaé. Ve nge w'abo mbia jam, ko fo' o woñ ; amu a nji be'e fansoñ ébe'ebe'e ; amu a ne mboésaé Zambe, nkun a liti ayaa e be nyô a bo abé. 5 Jam ete, mô't a yiane suubane e si, ve sa amu nsa'alan aya'a

étam, ve fe amu mone tyiña nlem. 6 Amu ajô ete nde mi aya'ane fe tas ; amu be ne bebo bisaé be Zambe, jam ete nde b'abo mban. 7 Yaka'ane be memvôla mete mese : tas e be nyô a nyoñe tas, duan e be nyô a nyoñe duan ; woñ e be nyô mi ayiane ko woñ ; ésemen e be nyô mi ayiane semé.

Enye'esane Ya Bobenyañ

8 Te biane môť éziñ mvôla, vengvenge ve énye'esan ya mia mia ; amu nyô a nye'e ébemôťô a jaléya metiñ. 9 Memvinda manana, " W'aye bo te bo mejian ; W'aye bo te wôé môť ; W'aye bo te wub ; W'aye bo te nyamete ;" a mvinda éziñ é ne, é futu e njôane wuna été na, "W'aye nye'e ébemôťô ane womien." 10 Nye'an ô ne te bo ébemôťô mbia jam ; ajô ete, nye'an ô ne njalane metiñ.

Nsubane Bebé Ya Môse Krist

(Ef 5 : 3-18 ; 1 Tés 5 : 4-10)

11 A jam afe, ke mi ayem éyoñ mbu jina na, a nto fo'ô mia awolo ya vee ôyo ; amu éyoñe ji nnyian ô nto bia bebé a dañe môs bi nga taté buni. 12 Alu e nga ye man, a môs ô nto bebé ; ajô ete mfinda'ane mimboan ya dibi, bi tame jaé biôm mewosan bi éfufub. 13 Bi tame wulu ane d'ayian, ane ba b'awulu a môs ; sa e mbia ndian a ñwuane bilam été ; sa e mejian a e mbia bivôé été ; sa e ntañete a mesengan été. 14 Ve mi jaéane Nti Yésus Krist, a te bôndane mam ya minsône fek, ane mi aye bo mbia minkômbane ya été.

Bo'ô Te Ve Monyoñ Mekua

(Rôm 15 : 1-7 ; 1 Kor 4 : 3-5 ; 8 : 7 ; Kol 2 : 16)

14 1 Mi nyoñane nyô a ne atek mfa'a ya mbunan ; sa mfa'a ya mfeane bifia. 2 Môťe wua a buni na, a ne di biôm bise ; ve nyô a ne atek a di ve bijebejeba. 3 Nyô a di a bo'ô te biasé nyô a tyi ; a nyô a ne te di, a bo'ô te ve nyô a di mekua ; amu Zambe a nyoñe nye mvô'é. 4 Wo ô ne za, w'ave éza mboésaé mekua ? Nnye a tele nge ku e be Nti wé. A ye su'uban, amu Nti a ne ngul ya telé nye. 5 Môťe wua a semé ngume môs a dañe wu mbok ; mfe a semé môse mise avale da. Môť ase a tuka'a bi'ili ôsimesane vié été. 6 Môť a semé môs, a semé wô amu Nti ; a nyô a di, a di amu Nti, vôm a ve Zambe akéva ; a nyô a bo te di, a bo te di amu Nti, a va'a fe Zambe akéva. 7 Amu teke'e môť wua ya be bia a nyiñ mfa'a wé émien, a teke'e môť a wu mfa'a wé émien. 8 Amu ja'ana bi anyiñ amu Nti ; bi awô'ô a Nti. 9 Amu jam ete nde Krist a nga wu, a beta veebe, nde ete a ne Nti ya miñwuan a bevevee, bebaane. 10 Nde wo w'ave monyoñ mekua amu jé ? a wo fe w'abiasé monyoñ amu jé ? Amu bia bese bi aye tebe asu éto ntyi'ane mejô Zambe. 11 Amu e ne ntilane na,

" Ane me vee, nalé Nti a jô, aboñ ese d'aye kutubu si e be ma, a ôyem ôse vi aye kañe Zambe." 12 Nalé ate môť ase ya be bia a ye bo nkat e be Zambe mfa'a wé émien.

Bo' o Te Kolé Monyoñ Obak

(1 Kor 8 ; 10 : 23-33)

13 Ajô ete, mbo'ane te veane mekua bia bia, ve tyi'ane na, mô't a bo te bôôé monyañ jôm ya kolé ôbak na a bo abé. 14 M'ayem, a me tu'aya buni e be Nti Yésus na, teke'e jôm é ne mvin e be ébien, ve e be nyô a lañe jôm éziñe na, é ne mvin mfa'a wé. 15 Amu na, nge monyoñ a wô'ô abé amu bidi, wôna ô nji fe wulu ane nye'an. Te jaa mô't Krist a nga wu ajô dé a bidi w'adi. 16 Nde mbamba mboane wônan a bo' o te toteban abé ; 17 amu éjôé Zambe é nji bo ndian a nyuan, ve zôsôô a mvo'é a mevak e Mfufub Nsisim été. 18 Amu mô't a saéane Krist mfa'a ya mam mete, Zambe a yen nye mvaé, a bôt b'akañese fe nye. 19 nalé ate, bi tame tôñe mam me ne mvo'é, a mam ya nkômôtane bia bia. 20 Te ndaman ésaé Zambe amu ajô bidi. Biôm bise bi ne fo' o mfuban ; ve e ne mô't mbia jam nge a di jôm j'akolé ôbak. 21 A ne mvaé na, ô bo te di tit, nge nyu wain, nge bo jam éziñ afe monyoñ a ne kolé ôbak. 22 Mbunan womien ô bili, ô ba'ale wô ve asu Zambe. Mô't a ne te ve émiene mekua mfa'a ya jam a kañese, nnye a ne mvom. 23 Ve mô't a sôan, a nto mekua nge a beta di, amu a bo te di a mbunan, a jam ese e ne te bo di ya mbunan e ne abé.

Njeñan Mvaé Beébebô'tô, A Sa Enjenan

(Rôm 14 :13-23 ; Fil 2 :1-5)

15 1 Nde bia, ba bi ne ngul, bi ayiane be'e mimbe'e mintetek, a bo te jeñ mvaé jagan biabebien. 2 Mô't ase ya be bia a bo' o mbamba be mam e be ébemô'tô wé, ane mô't ate a ye yene mvaé, mfa'a ya kômô'tô nye. 3 Amu Krist a nji jeñ mvaé jé émien ; ve ane a ne ntilane na,

« Minkomekan ya ba be nga komekane

wo mi nga ku e be ma. »

4 Amu mam me nga tiliban melu mvus, me nga tilibane na, me ye'ele bia, nde ete, amu njiban, a amu mvolane minlem, bi bi ndi minlem. 5 Zambe ya njiban a mvolan nlem a bo' o mia nleme wua, nyina mfa'a nyô mbok, aval ane Krist Yésus, 6 nde ete mi aye bo tyiñe jia mfa'a ya wumulu Zambe, nyô a ne Esaa Nti wongan Yésus Krist.

Mbamba Foé Mfa'a Beyude A Bikul Avale Da

(M.M. 3 :25, 26 ; Ef 2 :11-19)

7 Jam ete nde mi nyoña'an, nyina a nyoñe nyô mbok, avale fe ane Krist a nga nyoñe mia mfa'a ya duma Zambe. 8 Amu m'ajô mia na, Krist a mbe mboésaé bentyi'an atele amu benya mejôô me Zambe, ane a ye yemete mintiñetan mi nga veban e be bemvamba, 9 a na, bikul bi aye wumulu Zambe amu nkoan éngôngole wé ; avale fe ane e ne ntilane na,

Rev. Matthias MEYE
Secrétaire Général 1961

« Ajô été nde m'aye kañe wo zañe
biku,
a yia jôé dôé bia. »

10 A beta jô na,

« Va'an, A mia biku, mia be bôte bé. »

11 A na,

« Kañane Nti, mia bikul bise ;
a meyoñ mesese'e me sek'éé nye. »

12 Nalé fe Yesaya a jô na,

« Ndi Isai w'aye bo a môt a ye
tebe na, a jôô biku ;
Nye ate bikul bi aye tabe nye ndi. »

13 Nde Zambe ya ndinlem a jalé'é mia a meva'a mese a mvo'é ya buni nye, nde ete mi aye dañe bi ndinlem a ngule Mfufub Nsisim.

Paul Niôman E Be Biku

(I Kor 15 :10 ; 2 Kor 10 :13-18 ; 12 :12)

14 A bobejañ, mamien m'atu'a buni ajô denane na, miabebiene fe mi nto njalan a mvaé, njalan a ñiyemane mam ôse ; mi ne fe ngul ya leban, nyina a lebe nyô mbok. 15 Ve me maneya tili mia mejô méziñ a abui ayok, ane me ne fô'ô ôsimesane vianan. Amu mvam é nga veban e be ma é so'o e be Zambe, 16 na, me bo mboésaé Krist Yésus mfa'a biku, na me bo ésaé pretre ya mbamba foé Zambe, nde mvean ya biku w'aye bo jôm é ne nkañesan, amu ô nto ntunan a Mfufup Nsisim. 17 Ajô ete, e be Krist Yésus, m'ayiane bo mebun a ésaé jam mfa'a Zambe. 18 Amu m'aye bo te zômbô kobô mam mefe ve ma Krist a nga mane bo e be ma, na me dutu biku be bo mewôk, a nkobô a bisaé, 19 a ngule mendem a bitua bi mam, a ngul Nsisime Zambe, nalé ate, ataté Yérousaleme akui mefôla m'abôman, ja'an akekui Ilirikôn, me nga mane kat mbamba foé Krist ; 20 nalé me vuñu na, me kat mbamba foé, sa vôm Krist a tameya totebane jôé, amu me za lôñ éza mbôka'a yôb. 21 Ve ane e ne ntilane na,

« Ba foé jé é nji kateban, b'aye
yen,
a ba be nji wô'ôtane nye, b'aye yem. »

Paul a Bôndé Fe'e Ya Ke Jome Rôm

(Rôm 1 :9-15 ; 2 Kor 8 :1-15)

Rev. Matthias MEYE
Secrétaire Général 1961.....

22 Jam ete fe nde me nga jaé kambane na me bo te zu e be mia. 23 Ve éyoñe ji, amu me nji fe bi vôm e mefôla ma, nalé fe amu abui mimbu di me nga dañe ya'a na, me zu e be mia, 24 éyoñ ése me ne ke e Panya, me too ndi na, m'aye yene mia éyoñ m'aye lô e be mia, a na, mi aye li'itane fe ma e zen, ane me nga taté yen mvaé abim éziñ melu mvus e nsamba wônan. 25 Ve éyoñe ji m'ake e Yérusalem a mvolane ya mimfufub. 26 Amu ba ya Makédônia a Akaya be nga yen mvaé ya kôane mimvean miziñ mfa'a minzôzoé mi too zañe mimfufub mi ne e Yérusalem. 27 Yaa, be yeneya jam ete mvaé, a be tii mvôla e be be. Amu nge bikul bi nga kabane ngab ya bibotane biab ya Nsisim, be tii fe mvôla na, be volô be a biôm ya minsôn. 28 Ajô ete, éyoñ me sondôya jam ete, a me mane kalane be bibuma bite, m'aye lô e be mia éyoñ m'ake e Panya. 29 Nde m'ayeme na, éyoñ m'azu e be mia, m'aye zu me too njalan a bibotan bi Krist.

30 Nde, A bobejañ, m'aye'elane mia amu Yésus Krist Nti wongan, a amu nye'ane Nsisime na, bia be mia bi fulane vuñe ye'elane Zambe ajô dam ; 31 Nde ete m'aye vas e mo me ba be ne te buni e Yudéa, a na, ésaé mvolan m'abo mfa'a Yérusalem é bo jôme mimfufub mi aye kañese. 32 Ndemben m'aye zu e be mia a mevak amu nkômbane Zambe, a bia be mia bi aye yen awo'an fufulu. 33 Nde Zambe ya mvo'é a tabe'e be mia bese. Amen.

Mebatan E be Bemvôé

(M.M. 18 :2, 3, 18, 26 ; I Kor 16 : 19, 20 ; 3 Yôh 5-8)

16 1 M'abendé Fébé, kale janggan, e be mia, nnye a ne diakon ya kirke ya Kenkréa, 2 nde mi aye nyoñe nye ane d'ayian mimfufub e be Nti, a volô nye mfa'a ya jam ese a ye jeñ mvolan e be mia : amu émiene fe a nga volô bôt abui, a mamiene fe.

3 Sila'ane me Priska baa Akulas, beébe bebobisaé bam e be Krist, 4 mmbe be nga ju metyiñe mab amu ényiñe jam ; mmbe fe, sa ma étam m'ave be akéva, ve nalé fe bekirke bese ya biku. 5 Sila'aane fe me kirke é ne nda jab. Sila'ane me Epénitus, nyô m'anye'e ; a ne mbômô ébuma ya Asia mfa'a Krist. 6 Sila'ane me Maria, nnye a ju'uya ésaé ajô dangan. 7 Sila'ane me Adrônikus baa Yunias, bivuvumane biam a beébe minkôme bam, ba b'awum e nsamba minlôman été ; mmbe fe be nga too me ôsu e be Krist. 8 Sila'ane me Amplias, nyô m'anye'e e be Nti ; 9 Sila'ane me Urbanus, ébe mboésaé wongan e be Krist, a Stakus, nyô m'anye'e. 10 Sila'ane me Apelus, nyô a ne nkañesan e be Krist. Sila'ane me nda Aristôbulas. 11 Sila'ane me Hérôdiôn, évuvumane jam. Sila'ane me nda Narkisas, ba be ne e be Nti. 12 Sila'ane me Triféna baa Trifôsa, e binga be ju'uya ésaé e be Nti. Sila'ane me Persis, minga b'anye'e, nnye a ju'uya ésaé e be Nti. 13 Sila'ane me Rufus, mô e ne ntoban e be Nti, baa nyia, nyô a ne éñwé a éñwom. 14 Sila'ane me Asinkritas, Flégônas, Hermes, Patrôbas, Hermas, a bobenyañ ba be be be too. 15 Sila'ane me Filôlôgus baa Yulia, Néréus baa kale jé, a Olimpás, a mimfufub mise ba be be be too. 16 Mô e ase a bata'ane nyô mbok a mfuban nlatan anyu. Bekirke be Krist bese be sili'i mia.

17 Nde, A bobejañ, m'aye'elane mia na, mi yemela'ane ba b'até mengam a bengôkobelô b'awosan ñye'elan mi nga nyoñ ; mi sa'ala'ane be. 18 Amu avale bôt ete e nji saéane Nti wongan Krist, ve me bune mab bebien ; a b'adu'u minlem mi ba be ne mvo'é a émviemviene nkobô a bikôkonemejô. 19 Amu mewô'ô menan me maneya mialene foé e be bôte bese, ajô ete m'ava'a mia. Ve m'akômbô na, mi bo fek mfa'a ya bo mbamba be mam, a mfuban mfa'a ya mbia be mam. 20 A Zambe ya mvo'é a mbeme fite Satan e mebo menan si. Mvam Nti wongan Yésus Krist é bo'o e be mia.

21 Timôteus, ébe mboésaé wom, a sili'i mia ; a Lusius, a Yasôn, a Sôsipater, bivuvumane biam. 22 Ma Tertius, m'atili kalate nyô, m'asili mia e be Nti. 23 Gaius, nyô me too e nda jé, a mba'ale ngume kirke, a sili'i mia. Erastus, évete nkalakume ya nlam, baa Kuartus, mojañe wongan, be sili'i mia. 24 [Mvam Nti wongan Yésus Krist é bo'o e be mia bese. Amen.]

Bifia ya Nkañan

25 Nde, e be nyô a ne ngul ya télé mia aval ane mbamba foé wom a nkatane foé Yésus Krist, avale fe ane nkulane nsolane jam ô nga too aso miaé mintô, 26 ve éyoñe ji, ô litibaneya e be bikul bise a zen ya mintilane bekulumejô, aval ane mvinda Zambe ya nnôm éto, ane bikul bi aye bo mewô'ô ya mbunan ; 27 e be mfefe'e Zambe, дума e bo'ok akekui nnôm éto, amu Yésus Krist. Amen.



Rev. Matthias MEYE
Secrétaire Général 1961.....